



KOCHUAM PING AH LÂNKAINA PROGRAMME (DELHI KOCHUAM)



To,

If undelivered please return to - TPC Office,
 P.O. Box - 107
 D. Phailian,
 Churachandpur - 795128
 Manipur, India



ESTD. MARCH 2008
NOVEMBER 2023

Hinna Vâk

AN ORGAN OF THE TANGPHAI PRESBYTERIAN CHURCH



SYNOD MATHÎL

- Presbyterianism
- I gam dinmun en ah Khanglaite pan lakna ding
- Pathian lopina ding hi in
- Panpitu nai zing Lalpa

Editor : Rev. S. Lama Vaiphei, Executive Secretary
Joint Editors : Rev. P.B Zosapthara, Consultant
 : Rev. K. Jama Vaiphei
 : Rev. Th. Samuel Vaiphei
 : Upa Lalminsang
 : Upa S. Lalpi
 : Pi Hawipakkim, Secretary, CKNP
 : Upa Genminlun, Secretary, CKKP
Business Manager : Pu Lalbiaklian, Office Superintendent
 TPC Office D. Phailian
 P.O. Box 107 CCPur-795128 Manipur
 Phone No. +91 9089623251
 Email - *ehinnavak@gmail.com*

Kum khat lak man : Rs. 150.00

A man pia nuam leh a la thak nuam ten Business Manager kianga hiatsak ding.

A SUNGAH THU UMTE

| | |
|---|----|
| 1. EDITORIAL | 01 |
| 2. KOCHUAM HUANG | 02 |
| 3. SYNOD MATHÎL | 03 |
| 4. PRESBYTERIANISM | 10 |
| 5. I GAM DINMUN EN AH KHANGLAITE PAN LAKNA DING | 14 |
| 6. PATHIAN LOPINA DING HI IN | 19 |
| 7. SERMON | |
| a) Panpitu nai zing Lalpa | 24 |
| b) Ziklo Dân | 27 |
| c) Tizat um tak leh lamdang tak ah siam | 33 |
| 8. SUNNA | 36 |

Moderator : Rev. Ngurthanmawia Sailo
 Secretaries : Rev. C. Lalrinliana (Sr.)
 : Rev. Thanglianlal (Jr.)
 Finance Officer : Rev. S. Khaikhawlam
 Statistician : Upa Kaikhokam
 Executive Secretary : Rev. S. Lama Vaiphei
 Consultant : Rev. P.B. Zosapthara

Hinna Vâk ah thu kisua zosia hi Editor ngaidan a hi suak puai



Pauchapna Thupi:

1. Presbytery Kikhawmpi lawting tak ah i matzaw thei ziak un kipak thu gen hitiu.
2. Synod Kikhawmpi 2-veina (2023) taksa leh thagau ah lawting tak ah mat a hi theina ding in pauchap hitiu.
3. Gamsung buaina ziak ah panlatu pawl chuam chuam ah puitute a ding in pauchap hitiu.
4. Relief In sakna sukbuaina bangma umlo ah a chiazawm jel theina ding in pauchap hitiu.

SYNOD PITING HI DING CHUN

Provisional Synod i hi sung ua hin vangsiat um takin i gam a hung buai ah, i mite tamtak chu In leh lo kihaltum in galtai dinmun in i ding uh a hi. Amavang, i mother Synod te'u panpina tawh relief â ding in tamtak sathei dinmun ah i din uh hi malsawmna a hi.

Kumkit May tha a khin PCI Kikhawmpi lian Aizawl ah um ding a hia, i chungchang thu'u hi gen hi ta ding a hi. Pathian in pha a sak a hi chun Synod piting piak hi ta ding i hiu. Synod piting hitheina ding ah thil pawimaw te chu i Kochuam hi Presbytery pali ah khen ding ti a hia, gamthak nasepna a nei ding ti a hi kit hi. Chuleh, thil pawimawte chunkhawmna chun :

(1) Ama kitodel (Self-supporting): Sum leh pai dinmun ah buailo a hi ding a hia, ama leh ama a kitodel thei ding a hi ti a hi. Zia hin a kawp pen tak chu a sung ah semtute law a piak zaw ding, office leh thil dang a pawimawte a buaipei thei ding tina a hi.

(2) Ama kivaihawm (Self-administering) : Kivaihawmna lam thu a chun midangte panpina ngai khello ah ama leh a ma a kivaihawm thei ding ti a kit hi. Zia hin a kawp thei chu midang panpina kipawzo ham ham, midang a panlo leh amau leh a mau kitaksang zolo chu mani kivaihawmtheilo lai ah ngai hi ding tina a hi.

(3) Ama luangdawkw thei (Self-propagating): Ama chu hing zo ham ham bep hilo ah, suan leh pak nei ah hung pung thei dinmun a hi ding a hi. Zia hin a kawp thei chu amau kochuam sung thagau lam kisuhai thei, thagau mangthai vei ah mundang ah le luangdawkw thei dinmun a hi nau em ti a hi kit hi.

Zia a chung ah tēna pawimaw tak tak kigen te haw ahin eimau lungthim chiat kitē leu hen Synod piting nei thei hi leh hilo kihethei hi tiu.



Kochuam Huang

Kum 2023 Synod Kikhawmpi Chungchang

Synod Officers' Meeting 15:3 chun kum 2023 Synod Kikhawmpi mat ding dan chungchang in ziagual hin lemkuatna a nei hi :

- a) Gam buai lai a hi ziak in a jangkhai thei lam pen ah mat ding hi'na.
- b) Dt. 16.11.2023 ah Finance Committee, 9:30 a.m. – 12:00 p.m. chut hi'ntin, 12:30 p.m. – 4:00 p.m. hun sung in SEC Budget Session chut hi'na.
- c) Dt. 17/11/2023 ah Pastoral Committee, 9:30 a.m. – 12:00 p.m. chut hi'ntin, 12:30 p.m. – 4:00 p.m. hun sung in Nomination Committee chut hi'na.
- d) Dt. 18/11/2023 ah Kikhawmpi Vaihawmna hi Palai hisate bep chiakhawm ah nei hi'ntin, a hun ding in 9:30 a.m. – 4:00 p.m. hi'na.
- e) Lapawlte um pua'ntin, zan lam kikhawpnate le umlo ding a hi.
- f) Dt. 19/11/2023 Pathianni ah kikhawpna hun ziagual ahin mat hi'na:
- i) 10:30 a.m. Pathian Biakna Kikhawp ah Kikhawmpi Thagau lam thupi ngaihak hi'na.

- ii) 1:00 p.m. ah Lalpa Zan An Sacrament Kikhawpna um ina.
- iii) 3:00 p.m. Pathian Biakna Kikhawp ah Valedictory Sermon um ina.
- g) Manipur pawlam ah Synod dangte ah kipat palai (Fraternal delegates-te) chial hilo ding a hiu.

Kochuam Piting hita

I Consultant uh, Rev. PB Zosapthara chu Delhi ah va chia in, date 22.10.2023 (Pathianni) ah khan Delhi Kochuam chu Kochuam piting ah lankaina hun a va mang hi. Zia a va zin ahin Kochuamte tawh hun mantam tak mangkhawm in, 21.10.23 (Kiginni) ah le Kochuam huap Seminar te haw nei in, hun a lawk thei ding pen in a va mang thei u'i.

Relief In kisa masate lua hita

I Kochuam malakna ah gaitate um theina ding Relief In kisa masate (Phase-1) chu zaw thian a hi tak dungzui in October 31, 2023 ah khan a um dingte'n a lua pan tau hi. Zia In lua ni ahin CKNP malakna ah um leh bel kidawlkhawmte chu thei dan dan in Office ah hawpdawna a nei ua, a umna di mun tiang un YVA General HQ-te'n tawmngai tak in a va thaktung chiat u'i.

Tu leh tu ahin Buallian ah Relief In sakna le a chiatha zing hi.

“SYNOD MATHÎL”

(Thp.11:14;16:1-3; Php. 3:12-16)

~ Rev Thanglianlal
i/c Munpi Pastor Bial

Thumapui : Mizoram Synod in kum 20 vâl eila etkawl nungin mani kênga ding ah Synod pakhat hita ding ah Presbyterian Church of India (PCI) Biennial General Assembly in ei pawm a, Tângphai Presbyterian Church Provisional Synod (TPC) chu Dt. 20th November, 2022 (Sunday) ni'n apiang dawakta, kipak a um ma ma hi. TPC Synod naupangcha hin malam ah challenge tamtak inei ziakin mathil kitûp tak inei uh a pawimaw takzet hi. Zia mathil ineite hi committee leh kikhawmpi vaihawmna mangah sukpitin zêl ding a hia, Tualsung, Bial, Presbytery, Synod leh General Assembly tiangah lutto ding bang a um seka, zia chu i Kochuam kivawpdan/chiadan te tawh a kikallo ding a hi. Committee in khenkhat a sukpitin pai thei a um gualin, hun sawt deu lût ding le a um sek hi. Tu hun a hin, TPC Synod Mathil dinga pawimaw deu tângpi vak taklang hitiu.

1. Pastor Bial leh Presbytery Siamlem : May 3rd 2023 ah Meitei leh Thingtang mite kâl ah buaina suak apat in chenna In, Pastor qtrs, Biak In, tamtak suksiat leh halhâk in a um a, TPC sung ei sukkhak nasat dan Synod Executive Committee-4 veina 15th June, 2023 ah report

hung lutdan a chun- Biak In- 16 Pastor qtrs-04, Private In- 257+ leh relief Camp a um zat- 1918 + a hia, Mizoram leh State/ Khawpi mun chuam chuama galtâi bang ahem zâttak a um bawh hi. I hêtsa gualun Meitei tawh kâla buaina hin Kochuam ei sukha nasa takzet a, chenna

khua/Kochuam, Bial leh Presbytery khenkhatte hi bei chetlo himaleh mumal takin a function theita puai ti imu, I kochuam tununga a hung kitûp zâwka a hung hât thak kit a, mumal deu ah a hung chia hawi kit theina ding in, i Kochuam/Khua umna mun/ Geographical location te, Bial station umdante a lemchâng zaw dingte en in siamlem thak a pawimaw ta a hi. Pathian zâla i Kochuam hi khanglian zêl leh masawnto zêl ihina a hin i bulpi lamte bawldan entawn in **Gampaw Presbytery** bang siamdaw le a kûl in a kilang ta a hi.

2. Mission School/Kochuam School : Tu dinmun ah Synod School ti thei ineisun chu, Rostad Memorial High School hi a hi. Pathian zâlin i Kochuam School hi a khanglian zêla, eimau phâk tiangin i enkawl hawi ua, Student/Zillai naupangle nidang sangin inei tam deu deu ta, kipak a um ma ma hi. Zia haw hi Kochuamte pauchapna zâl leh semtute kipiakzawna zâl a hi ti imu thei a, kipak a um takzet hi. Tulai

a hin Private School hawi a tama, competition le a sâng in, nasa zaw sêm a ei unle panlak deu-deu a ngai a, result hawi inei uh a pawimaw takzet hi. A bang chu hitaleh, i Kochuam school hi Pathian na isepnau, migenthei kithuapina, Gam leh Nam masawnta ding, Pathian Gam kêkletna leh Kochuam sukdetna ding leh tununga le ama leh ama hung kitodel thei dinga isiam uh a pawimaw, zia dinga chun, kochuam leh a nasemtute pan ilak nasat sêm-sêm u a pawimaw hi.

Synod hin Tu ah School pakhat i neisa khêl a hin a dang siam belap thei dinmun in i dingzo nai pua, ahinla, thingtang gam i et chun Kochuam School pakhat isiamdaw'u hi a kûl takzetin a kilang hi. Govt. School umte hi kingakna tâk a tingzopua, mipi lungthima taksanna leh muangamna a umpuai ti hi ip leh gen kibang a hi. Nu leh Pa tamtakin haksa lehle ichateu Khawpi/Lamka lamin ikaisakua, mi in lua kawmin thiamna i del hâm hâm ua, puakgik a sang ma ma hi.

HINNA VÂK

Tûpêt a hin Thingtang gama Kochuam School hi bawl ziang theilo leu hinle, ziate dâwn zangkhai theina ding lampi khat chu Boarding/ Hostel pakhat Lamka mun vêl a hin siamdawk thei leu hin phachuampi ma ma ding a hi.

Government lama pat Thingtâng gam suk masawna dingin khawtin phialin School ei piau a, zia school umsate hi phataka a function-a i phatchuampi thei dingdan uh ngaitua a hun ta ma ma hi. Bang zia ah i gamua tutiang tianga School kitûp um thei lo a hi diam? Govt. ngaw ding a hem? kuapên ingaw diam-u?. Govt. in Thingtang gam puaphatna ding leh masawna dingin na tamtak asêm a, a kawchâwng tiangin School ei pia nalai ua, i vangphat dan uh gel dawk thak hitiu. I Govt. school umsate hi eimau khuta um, eimau â ma ma ahi zia kin, iphatchuampiu'a ilâwkpi theina dingun a etkawl na lama hinle mawpuakna tak tak ikilâk uh a ngai hi. Masawna him him chu daltu a um seka, mimal hitaleh, Pawl/thildang

hitaleh lampi daltu taphawt chu hangsan taka ido ngam uh a ngai a, zia lawtin theina ding a chun, Kochuam, khawtang leh a diaka Gam neitu Hausate hi i pangkhawm uh a ngai takzet hi.

3. Synod Munpi ding Gam leh mun chawkdaw :

TPC hin mun leh gam ineisate'u hi etkawl phat ah mat phatchuam zêl dingdan lampi ingaituau a ngai hi. Meitei leh Kuki-zo kikâla buaina zia kin Imphal mun ah i gam châwku khi ilua kit ngam/ thei ding uh gen a haksa ma ma ta a hi. Zia gual a chun mun dang dangle um thei ina, ziate hi thîlin kochuam malam hunding ngaitua in Synod Munpi ding Gam lian deu tak pakhat Churachandpur lama hin ingaitua vat vat uh a pawimawta a hi. Pathian zâlin i Kochuam hung khanglianto zel ding a hin, mun leh gam hung mamaw deu deu ding ihia, tu a kipat bawlpan ziang leu hin kisiklo hial ding ihi. Dan tak leh Bible School/ College te, Multipurpose training centre-te, guests house, Mission Hospital etc.,

te hi hung mamaw ma ma ding ihiu, zia zia a chun, tûpêta Mun leh Gam a kiman laia hin chawdawk thei leu hin vangpha khat suak i hi.

Rostad Memorial High School mun chungchanga hinle Govt. New Education Policy (NEP) demand/criteria izui uh hung ngaita ding a hia, zia ziaka chun, School mun ding Gam lianzaw ingaitua hung ngai ding a bang tai. NEP zia mawng hitalo lehle, tu ah School umna hi Office tawh kinaicha, compound khatsung guala um a hi bân ah, Vengsung kiteltêp tak leh BiakIn tawh kinai taka um a hi zia kin a lemchâng zawlona tampi a um hi. Zia zia a chun Khawpâm lam a bangma dangin a sukbuai phâklona mun kitûp school mun ding ihawl uh a ngai hi.

4. Pastoral Care and Counselling centre din :

Tulai hun Khawvel changkâng zêl a hin khawtâng leh Kochuam in a mamaw ma ma khat chu Counselling hi a hi. Zia hi Gam changkâng zaw leh kochuam

tamtakin a ngaikhawk ua a mat nasat ma ma tâk uh le a hi. Counselling phatchuamna hi gensêng ding gual ahipua, Pulpit sermon ah kochuam mite mamaw i piak zawlote panpi theina lampi phatak a hi. Khawvel masawn zêlin a puakdaw buaina leh haksatna tamtak a kibelapto zinga, Pathian nasepna ahin huapkim zawsên ding a hipua, mihing hinkhua ah buaina leh haksatna chuam chuam tuak zingte panpi theina ding a chun counselling nasepna tawh thuakhawm hi a lâwk ma ma ding a hi. Kochuam leh mimal/ Pawl khenkhatin counselling hawizia leh phatchuamna a muthiam zia kun Centre te bang a dinua, Counsellor bang a chuamin a gawi hial seku'i. I Pastor khenkhatte'u Counselling (Skill) lama zilna sangzaw zil bang le inei panta, tunung leh amau hi i kochuamin i hung phachuampi ma ma dingte a hui. Zia zia a chun, i Bulpite'u malâkdante i Synod hinle entawnin Counselling centre khat hawn daw dingdan ngaitua thei taleu hin thil phachuamtak

HINNA VÂK

hung hi ngei ding leh Tununga le Kochuam mi/kua hitaleh buaina a gûka nei hingâl zawtna dingpen helote'n ziatak chu hung zuan zung zung theita ding a hui. Chuleh, Counselling tawh kisaia i Synod malâkna dinga pawimaw dang khat chu, Pastor ilâk thakteu hi kumchenga Counselling training course thakhat bêk mithiam bîkte manga training piakto zêl hi bawlpaw thei hitleh a dawium hi. Zia hi a bîka Theological Colege ah course piting bawllote â dinginle apha, i Pastorte'u thuamhawina pakhat le a hi kîta, counsellor tamtak siamdawna khat le a hi ziakin ngaidaulo ding chî tak le a hi bawh hi. I nisin hinkhuau ah buaina chuam chuam i neite'u a diaka, Zu leh khamtheia buainate, nu leh pân kâla buainate, insung buainate, Sex lam a buainate, depression ziaka buainate etc., te hi Biakin Pulpit nasepna hin a sepsenlo a tam a, ziate hi counselling tawh thua ah sep daw theina lampi phachuam tak hung hi thei tân'a.

5. Mission/Gamthak nasepna lam : Mizoram Synod ah ilût masang ua khan Kochuam Pawl chuam chuamte hin eimau phâk tawh chiatin mission nasepna ila bawh chiat ua, Mizoram Synod ah ilût nungin EOC mission Field bîkte chu Mizoram Synod Board (SMB) in ei etkawh zui piakta, Assam & Arunachal and Jonai Mission Field leh a semtute zosia amau etkawh dingin ipedawka, Chingmei Field leh Myanmar te ahiu leh Manipur Area in i enkawh zui tau hi. Tangphai Synod imu nungin Mizoram Synod tawh sepkhawmna Memorandum of Understanding (MOU) Thuthung kum 5 dai ding izik zota, zia a chun, Assam & Arunachal and Jonai Mission Field leh a semtute zosia SMB etkawh dingin ipedawku a hi. Tu a ikhut ua um Myanmar leh Chingmei Field te hi bangti etkawh zui zel a pha diam ti leh i malam ah Gamthak/Mission bangti chiapi zêl a pha diam ti lunggel zing pumin Gamthak/mission mathil tamlo vak taklang kit hitiu.

1) Gamthak Commission

dindaw : Mission/Gamthak nasepna hin Gam pawlam hi henla gamsung hitaleh a malatu dingin Gamthak Commission siamdaw a pawimaw a hi. Zia hin Field thak hawn hitaleh, tu ah inei sate'u etkawl zui ding dan hung ngaitua masa'n tin, zia chu Synod Mission Board in hun bawzuito intin Gamthak nasepna/malâkna hung hat sêm-sêm thei ding a hi. Gamthak Commission chun Mission Board nasepna endik intin, na a septo zêl ding dan guanggalna siam piak in, chuleh, nasepkhawmpi thei dingte leh nasepna na mun dingte hun mala-to zêl ding a hi.

2) Home Mission din : I gam dinmun i et chun tu dinmun a hin Meitei-te tawh kikhen thiang tawbang ihita, amau laka nasep zêl ding dan lampi um thei tadilo phawt a hita'i. A hinlah, Meitei lak hikhello Namdang Kawl leh vai leh Pangal tamtak churachandpur tuama

umte lakah hin malak patna siam thei a hia, zia ding a chun HOME MISSION ti hi siam daw a kûl hi. Zia igente hi buaipi haksa/pawimaw salo ium maithei hi, a hinla, chanchinpha gen hi Namtin, chitin laka gen dingin Lalpa'n ei sawl a, Gam gamla taka pawtdawkw theilo leu hinle, i kiangnaicha umte kiang bêk a hin chanchinpha gen ibat uh a hi. Zia hi igêl phaklo lamtak uh le a himaithei a, Lalpa lemkuat leh ei kona zâwk a hi chun lawting ma ma ding ihu.

3) Myanmar Field : Myanmar gam hi foreign gam a hia, a etkawl na hile thil bailamlo tak a hi. Myanmar field etkawl zui zelna ding a hin a masa pen a chun, Myanmar Presbyterian Church Synod tawh kiho tuaka, amau etkawl na nuai ah umsak thei dingdan lampi hawl leu hin eimau etkawl sangin a piting thei zaw diam? ti ngaidan a um thei hi. Eimau etkawl zui zêl ding ahi tâk a hileh le, Moreh

Town a hin i Kochuam a um a, zia hi Myanmar Field head quarter guala mangin etkaw! hi henla, Moreh hi Bial Station ah siamin Sub-office le hi ngal thei leh pha dingin ginchat a um hi.

4) Chingmei Bial: Chingmei Bial hi ahileh Meitei tawh kikâla buaina a kiven pai ding ginchat a um lo zia kin, malam ah amau hi tu ah semtu lawman ipiakteu hi a pension tiangu piakzawm zêl hihenlah, field hi ahileh PCI nuai ah Meitei Synod-te khuta piak daw ding dan lampi hawl hileh navâk zawkna hi ngei dingin ginchat a um hi.

Khumkhakna: Synod Mathil i tâklatte khêla hin igenkhaklo tamtak um ngei ding a hia, ngaitua zuina dinga genhawanna gualin mang hitiu. Khawvel masawnto zêla Kochuam nasepna hin mithiam zawte alût tam deu deu thei ding dan uh lampi isiamlo chun, kochuam hi hung chautha pai ziang thei dinmun ah ding zing a hi.

Kochuam hâtna leh masawn zêlna dingin, Kochuam memberte kipumkhatna leh kilunggualna hi bangtik laia le pawimaw zing chu a hi. Khawvel mun chuam chuam ah midangte tawh sepkhawm a pawimaw a, ziana ding a chun i kihawn let deu deu-u le a pawimaw kî! hi. Kochuam kipumkhatna hi masawanna bulpi pen a hia, Kochuam Pawl dangte tawh kipumkhatna ihawl bep uh hunsak loin, eimau huangsung ngei ahinle kilunggualna leh kithutuak taka panlâk khawmna hi a ngai zing hi. Zialo hin chu Pathian malsawmna dawng thei ngailo ding ihu. Kochuam sungah umte hi lungthim munkhat ah ding khawm a, kithugual taka sepkhawm dial dialna hi a pawimaw a, Synod ah i pankhawmna' u suhêk thei chî Kochuam mal/Bial ahem, Presbytery a hem in project a chuam chuam chiapilo hâm ding leh, i phatchuamngaina te' u luangkawm sak dingin panla chiat hitiu.

Simtute Lalpa'n hun malzawl taken.

“PRESBYTERIANISM”

~ Rev. Ngurthanmawia Sailo
i/c Imphal Pastor Bial

1. Prebyterianism hi bang a hi em?

Presbyterian ti paukam hi ahung kipatna bul chu Greek pau ‘*Presbuteros*’ ti ahia, a umzia chu ‘*Upa te vaihawmna*’ tina leh ‘*Kikhawmpi mang ah mipi ai-aw ah Palai têt chuamte, Upate leh, Sawlchakte vaihawmna Kochuam*’ ti in a genthei mai hi. Presbyterianism i tiu chu Presbyterian kivaihawmna Dan leh kikaihuaina Dan genna a hi mai hi. Siamphat Kochuam nasemtu Luther-te, John Calvin-te khan zia hun lai ah Kochuam (**Roman Catholic**) kha khendan a tup him him uh a hipua, Thuthung Thak Kochuamte kivaihawmna (**Presbyterianism**) kha suk hin ah siamphat kit a tup uh a hi. Nidang lai ah Thuthung Thak Kochuam dinmun gual ah a um kit theina ding ua siamphat chu a tup pen uh a hi. Himaleh a tup gual uh chu a lawting zaw taklo ziak in Roman Catholic chu a hung kekjàk a, Protestan Kochuam tamtak a hung piangdawk a, Presbyterian Kochuam i ti pen uh hi Kum 1590 lai vel khan Scotland gam ah ahung ding pan ta a hi. Presbyterian ti minpu Kochuam a hung dinna ah mapuitu pawimaw tak takte chu John Calvin leh John Knox te kha a hui. Siamphatna na semtute’n Kochuam chiasualna ziak a mudaw’u ngun tak ah zil in a phalaite sunzawm in zia Kochuam lopi tak hi a hung piangdawk ta a hi.

2. Presbyterian Kochuam Thugin kingakna bulpi Panga :
Presbyterian Kochuam chun reformers khenkhatte thugin kingakna pangak (Five Solas) a la siam te’u chu kingakna in

a mang sunzawm jel ua ziate chu :

i) Hepina bep, (Sola gratia):
Pathian leh mihing kizawp matna zosia- hukdamna, thiangthona, lopina leh

HINNA VÂK

malzawlnate hi mihingte'n a tit ziaak uh hilo in, Pathian hepina ziaak a hi. Hepina chu ginna bep in dawn thei a hi.

ii) Ginna bep (Sola fide):

Pathian hepina chu ginna ziaak ah dawn ding a hia, nasep ziaak hilo in ginna ziaak ah hepina ah hukdam ihu.

iii) Pathian thu bep (Sola Scriptura):

Pathian thu (Bible) hi hin ding dan tena dik lo theilo um sun a hi. Mihing ngaituana leh hiatna chu tena dik lo thei vek a hui.

iv) Khrista bep (Solas Christus):

Mihing hukdamna, hinna leh vaihawmnate a chun Khrista bep gin tâk a hi. Khrista chu gingtute um na ziaak, Kochuam leh Khawvel ah thuneitu sangpen a hi.

v) Pathian lopina ding bep (Sola deo Gloria):

Mihing hinna umna ziaak umsun chu Pathian lopina hi a hi. Thil zosia umna ziaak hile zia ziaak hi a hi. I thil bawl zosia'u phat leh phatlo tena tawpkhawk chu Pathian lopina a tingzo em ti hi a hi.

Zia ah thugin bulpi panga hi Kochuam kingakna suangphum panga gual a hia, khat ziang hile a kimlo chun Pathian Kochuam hina a kim thei lo a hi. Theology zosia hile zia thugin bulpi panga te ah kipat bâkkai a hi ding a hi.

3. Presbyterian Kochuam chawn leh Khandan :

Kochuam zosia hin chiadan leh chawndan a kinei vek ah, Presbyterian Kochuam chiadan leh chawndan chu Upate vaihawmna a hi khêl ah zia gual hin a gen thei hi -

i) Mimal thunei tu diak a um

puai : Bishop nei Kochuam ah chun Bishop chu a hotu pen a hi mai a, a nuai ah pastorte'n a lau un a mitmei a veng zing ui. Pastor te'n le a Kochuam etkawlna chung un thu a nei kit ma ma'u hi. Presbyterian Kochuam ah chun hotu hina chu 'Moderator' i tiu a, hina det a hi pua, thuneina lam hilo in kaihuaina lam a hi zawi.

ii) Mipi vaihawmna a hi :

Thuneitu bîk mimal a um lo ziaak in Khawmpi a hem, Committee a hem thuneina

- a hi; ziaziakchun, Khawmpi leh Committee hi a pawimaw ma ma a hi.
- iii) Vaihawmna a suang ah kitha-thâ a hia, i vaihawmna'û chu Kochuam mal apat in Bial, Presbytery, Synod leh Assembly ah a kithung to ah. Zia ah khawmpi leh Committee hin vai a hawm sek hi.
- iv) **Thupuknate chu zawp ngei ngei ding (binding) a hia:** Thupukna chuam chuamte hi zawp ngei ngei ding ah ngai a hi. Zia hi Kochuam dang tawh i kibatlona khat uh a hi.
- v) **Kivaihawmna fel :** Chiadan fel tak nei hi Presbyterian Kochuam zepi leh hawi pente lak ah khat a hi. Lawting tak ah Kochuam a chia zel theina ding in Dan Pi (Constitution) a nei a, dan neu leh chuam chuamte le siam a hi kit hi. Thugin le genbuai sak buai a umlo na ding in Bible thu ngei ah kipat in siam a hia, zia hi zawp ngei ngei ding dan a hi kit hi.
- vi) **Thumatna a ngai pawimaw hi :** Presbyterian Kochuam

hin kithumatna ah a dutui ma ma a. Hindan pha (moral standard) nei ding kikaihuaina a siam a, a zawm lo te chu a thunun sek hi.

4. Presbyterian Vaihawmna kitha-thâk dan leh Vaihawm dan- Mipi vaihawmna :

Presbyterian Kochuam chu vaihawmna kitha-thâ (Church Court) mang ah vai kihawm i hui a, zia ah Kochuam vaihawmna kitha-tha te chu- Tualsung Kochuam Committee, Bial Kikhawmpi, Presbytery Kikhawmpi, Synod Kikhawmpi leh Assembly Kikhawmpi te a hui. (***Khawmpi ti mai lo in Kikhawmpi ti hi mat ham ham ding a hi***). Zia te hi amau huam sung chiat ah chun thuneina nei a hui. Dan bu mang in Kochuam vaihawmna chu chiapi a hia, zia khel lam a hin Committee chi chuam chuam a um kit ah, Bial leh Presbytery ah chun Standing Committee in kikhawmpi kikâl ah thungaitua ding kûl leh pawimawte a ngaitua sek hi. Synod ah chun Synod Executive Committee a um ah, Assembly ah chun

HINNA VÂK

Assembly Working Committee a um kit hi. Zia khêl a hin le Pathian nasepna suhat ding in Committee bâk chuam chuam a um thei kit hi.

Presbyterian hin kikhawmpi pali i nei ua, Pastor Bial Kikhawmpi, Presbytery Kikhawmpi, Synod Kikhawmpi leh Assembly Kikhawmpite, zia hin Palai chi-2 : Palai hisa leh Palai têt te a um sek hi. Kikhawmpi palai te hin i mawpuakna'û i ngai pawimaw ma ma ding uh a hia, pei lo ziak mai mai ah panglo mai ding hi lo a hi. I pan theilo ding lehle bial/ Presbytery/ Synod – Secretary kiang ah i pan theilo ziak i hil ngei a pawimaw hi.

Presbyterian Kochuam ah chun thuneitu diak a um pua, kidawngtua ah, genkhawm min kei in thupukna siam a hi sek hi. Hotu nei Kochuam ah hotute dawidan namdet ding ah chukhawm gual mai i hi puau hi. Vaihawmna ah member zosia'n zalen tak ah mani ngaidan gen a thiang vek a, vote kibang member zosia'n a nei chiat ui. Chairman bepin Vote a neilo a hi. Kikhawmpi

ah a hi ziang lo chun ban phal ah vote lak hi a kibawl ngai puai. Lulna kibang vek nei i hi ziak un vaihawm member te mawpuakna a sang ma ma a, kithada khak chu thil khawk tak hi ding a hi. Mipi kivawihawmna a hi ziak in a pau ut diak a um tak leh a buai um thei sek hi. Member khen khat te'n suanlam neu cha cha te siam ah pang lo mai, ngaidan gen lo ah thip hiat mai mai a bawl ut sek ua. Fimkhul a ngai ma ma hi.

5. Thutawpna : I gen tak gual in Presbyterian Kochuam chu chiadan fel tak nei, vaihawmna le fel tak ah chiapi zing kochuam ihu a, Ki Lal sak leh ki thunei sak diak a umlo na dingin Committee leh Khawmpi mang in Kochuam chiadan ngaitua leh vaihawm fel sek ihu a. Tichun, Pathian thu pawmdan a le Bible zilsakna ngun tak ah zil kawm in Kochuam kingakna fel tak in a siam a, ziate hi Kochuam mite hin i hiat ua, i paudan leh i thu ngaithak dan ah le i kochuam kingakna thugin tawh a ki mil em ti hi i ngaitua zing uh chu a pawimaw in a pha a hi.

“I GAM DINMUN EN AH KHANGLAITE PAN LAKNA DING”

~ Rev. Ph Thianneilal Vaiphei
i/c Delhi Kochuam

“La khangdawng hi’na kuama’n hun musit ki’hen; himaleh, pau dan leh tawidan, hepina, ginna leh thianthonate ah chun gingtute ettawn dingin um zaw ta’n” – 1 Tim 4:12

I gam dinmun uhi mi zosia’n hegil lo, Meitei leh Kuki-Zo suante buaina gal iti mai ui. Dik le a dik ma ma hi. Aziak chu Meitei te’n eimu dan un haomacha i hiu ua, zia chu musit um, nam neu leh Zo ah khawsa, gamsa gual ah chankang lo tina a hi. Himaleh, zia thumal hin a gamluatu, a neitu tak tak ihi nau a genchian ten hi. Ei bawl dan uhi Aigupta mite’n Israelte a bawl dan gual u kha ihiu (Exod 1). Aigupta te’n a sukgenthei ua, tha chimit ding a tiu ahia maleh Israelte chu a chi pha ma ma ziang ua, a ziak chu Jakob leh Joseph Pathian in a maljawlna kha

a chan vanglai tak uh a hi. Ziagual a chun Meiteite hin pil thei takin i economy uh suksiat piak a, genthei tak leh musit um taka kawi ding ei tiu a hi. Zia sukpitinna dinga chun bang bang a hun bawl uh em? Pil thei takin i MLA te’u thuzaw in Tribal Development Office a hun thuzaw ua, i ki-invenpi’u Nagaland leh Mizoram thingtangmi te’n Class 1 apat chunglam kum sin ah Scholarship nei ah lekha a zil thei lai un; ei uh chu class 10 passed khel khel ngai a hi. Zia chule scholarship tia vak kineppi thei ah tam le a hi puai. Himaleh, zia sum tawmcha kha Pathian lopina

HINNA VÂK

ding in khenkhat in ga masa thawlawm in a scholarship mu masa pen chu Pathian kianga kilatna thawlawm in a piau a, nauchaga chawmna In ah pia te a um ua, chuleh sawma khat hawi taka pia in mu kham kham in Pathian i hung chawihawi ua, a sum tamlo maleh Lalpa malsawm gim a nam a, Pathian in neucha kha lianpi in ei malsawm ta'u a hi. MA, MSc, MEng, MTech, MCom, LLM, MBBS, MBA, M.Th, PhD, D.Th tiang in lawtinna chi chuam chuam in ei malsawm zel uh a hi.

Zia chule hun tawk a sa puau a, government service ichan ding te'u ei chupiak kit nalai ui. Ziagual ah thiamna leh economic lam ah sawisakna nasa tak ei nei maleu le central services UPSC nuai ah IAS, IPS, IAAS, IDAS, IDES tite i hung tam ua, Manipur high ranking officer chu eimite i kitiang dim ziang tau hi. Amau malakna zalin state service eila chupiak teu kha neu khat khat ah i hung kilua kit thei

pan pan ua i dinmun uh a hung hawi to zel hi. SSC nuai ah service chuam chuam ah te kum sin in i hung lawting to pek kit zel ua, Banking lam in le Branch manager tiang le i hung tam ma ma tau hi. School, College leh University lam inle PhD zo te lecturer ah sem i tam kit ua chuleh Army lam ah le chuti tho chu i hung hi to zel ua a hileh lunggil takin ei huphul ma ma tau a hi. Manipur ah high ranking officers IAS, IPS leh CBI lam ah le a kikhutsan to pek ding eimite a kitiang to pek ziang uh a hi. Musit ah um Kuki-Zo suante chu i hung khanglian zel ua, sukchimit dinga kisugentheite chun meiteite chu i hung khankhel di kisak ziang u leh ngaithei lo a hiu. Chuti a hileh i gam leh nam dinmun chu mi zosia; a diak ah khanglaite hin i hetchian uh a ngai ma ma hi.

Mi masate khan lekhabu lui leh phuton thaumei – nak hawm sung vawm thit thet ah taima takin lekha a la sim ua,

officer khat po po hiding a la tup ua, nam lian leh chankang zaw meiteite huphul leh lau di khawp ah thiamna leh lawtinna a hung neitheih uh a hi. Chuti ahi zia in khanglaite hin maban ah panlakna ding tam tak i nei ui ti hiai tiu. Zia tiang dinmun i hung tun to nau hi Pathian zia bep a hi. I nu leh pate'u in Pathian a la zabawl ua, a pauchap tam ua, anngawl pauchapna a ha nei ua, chate hil dinga pilna neilo in, hil thei lo maleu le Pathian khut ah eikawl sak ua, Pathian in ei enkawl uh a hi.

Israelte khale Pathian namtêl a hui ua, maleh Pathian in a kiheisan sek hi. Bang hun ah? Ama lau lo leh a thupiate a zuilo phat u leh a kiheisan sek a; mihing ngai ah kilawm bep ah Pathian a ho phat un a kithawina'u khale a sang pua, luaksuak um a sa ma ma hi (Jeremiah 6:20; Isaiah 1:11–15; Amos 5:21–23). Tun le i officer te'u leh MLA te, ahiloleh i nam lamkai te'u hi en tiam

u! I lu dawmsangtu i Lal leh i Pathian u hi, a chawihawi in i hiau em? Officer Biak In kikhawm ki tawm ma ma, MLA kochuam ngaisak um bek lo, nam puitute kochuam zabawl tawm deu deu a bang tai. Pathian in a hia vek in, a mu vek hi. Malsawmna i chan teu hi a piatu Pathian a lungawi lo hun hun ah a lûlna (value) bei ah kawi thei Pathian a hi. Leng Saul khan Pathian a kiheisan a, Pathian a chungin a lungawi ta pua, tichun, leng inpi sung ah thithabuak in a lungthim subuai in mingawlte gualin gutut nei in a phun vel vel mai a hi. Tun le a tamzaw mitmu in officerte leh mi thupi ikiletsakpate kha gal jam mai mai i hung hitau a hi. A mun mun in thiam thu gen ding vang nei chiat na'n au. I buaina ding uh hia masa le a um diak puau. Nang leh kei mi naran gual tho a hi mai ui. Pathian umpi officer leh puitu, Joseph gual hi ki um lo dan a hi tai maw? Pharaoh chun a suakte kiang in, "Zia gual

HINNA VÂK

ah Pathian thagau umna hi midang mu zo ding i hieu em?" ti'in, suak leh sal ah kiman himaleh gam vaihawmtu ah kaisan sak lo khak ding a lau in, a gam pumpi thu leh la chu ama het lou leh ama thu loin bangma a kibawl puai (Gen 41:37-57).

I hung buai tak tak un chuh kochuam piting belthei pawimaw zia i hedawk thak ui. Tutiang ah kochuam lian leh piting belna chang hia lo, tulai thil umzia hia ipmutna pat khang hal nailo, hal di le gua nai diak lo ihu chun lungsiat um kumkhua tai tiu. Khawvel history hi i et leh Pathian lungawi lona gual ah umte hi gingtu hi'n ginglo hita leu le kuama a ding zo tak tak puau. Ei uh vang Aksi lekha thiam ten Herod a lepbawl gual un, ei lepbawl uh a hi. Aziak chu Mosi gual ah a chi-a nam ngaina entha zing (spy), gam vaihawmtu te'n ichi leh nam a ding ah thu dik lo leh sepguan bang a um em tia ngaitua leh pilvang taka

suangtua zing umlo le hin a. I nasep uh leh i panmun ua gin umlo, law muna a hi po leh tia lungmuang ah um i tam tau ah le hithei ahi.

Chuti a hi ziaka chun khanglaite hin, "Tulai hun umdante hi hia'n ipmu lai thawhal a hun tak zet tai" ti hia'i tiu (Rom 13:11). Zia a chung kigente hi ngaitua veng veng hitin uh, zia gual hin pan lathak hitiu.

1. Lekha simna lam ah pan la thak hitiu. Malai mite gualin i taima zo ta puau. Mobile phone leh kham thei thil kithunun sak ta puai tiu. Nam dang lekha simte a thiangtho un, a taima ma mau hi.
2. Thiamna i nei phat leh nasep ding Pathian kiang ah dawn hitin uh, i mu phattak leh ti tak zet ah lungthim kipak pum ah sep ngei ngei ding.
3. I na chiat ah ginum ding, eima nasep tawh kisai thil po po hetchian gua

- (curiosity) khualchilna ah taimat sua ding a hi. Judate pilna khu a ziak dang le um na'n a, himaleh, a pi pen chu 'To be Jewish is to ask questions' ti a zui ua, thil sui lam in a lunglut ma mau hi. Zia chun Juda mite a supil in, kuaman Judate hetlo ding bangma a guanggal thei puai a tiu hi.
4. Ei pau thiam guat ding a hi. Lekha i thiam leh ei pau sukchankang guat di a hi. A chuti lo chun mi pau i ha mat chan un thuguk le a um thei puai. Tulai naupangte hi ei vaiphei pau i ha hil uh a ngai hi. I pau uh a thiam lo u chun Vaiphei hung ngaina ma ma ding in kinem kin.
5. Nei leh lam tam tak Pathian dawi dan ah kilam hilo, a kilan lo a tam zia kin a sumangthai ding 'nget' a hung pung sek hi. Khut thiang loah sum, thil, nei leh lam nei ding guat lo hial ding a hi.
6. Eima mimal lâwkna ding bep ah nasep hi tulai chia dan ginglote culture i kilak lut uh a hia, haisan ding a hi. I sepa chiat ah midang â ding ah malsawmna semtu khat hiding guat tin ten di a hi. Ziagual mi chu a ho hak, a kilet sak a um ngai puai.
7. Pathian leh a Kochuam zabawl a, i lungthim pumpi leh i theina pumpi ah support ding a hi ti lungtup ah nei ding a hi. Kochuam hi government khat ahin a vaihawmtu chu Pathian a hi ti hezing kawm ah Pathian lalgam â ding ah theitawp sua ding a hi. Kua nam hitaleh Pathian leh a Kochuam â ding ah thi tiang ah ginumte chu khawvel ahin nam lopi hin tin, Vangam ah le lawman mu ngei ding a hui. Ziagual nam lopi leh za um tak siam ding a chun khanglaite zosia Lalpa'n ei mang chiat ta hen. Amen

“PATHIAN LOPINA DING HI IN”

~ Rev. T. Zuanlal
Bethany Kochuam

*Chutichun la nêk unle, la dawn unle, la thil hi taphot uh chu,
Pathian lopina ding bep in hiu in. ~ 1 Korinth 10:31*

Kum 1643 in England of Parliament Inpi chun Solkal Bishop thuneina nuai, England Kochuam nuai a um chu dawî talo in a subei ua. England ah English Kochuam chu Minister 121 leh Mipi vântang (Lay-people) 30 te chu Westminster Abbey a kitîu a hi. A kumguk tinna a thupukna’u chuh England Kochuam kangthu a chun a thupi mama hi. Zia a thupiu ah dawtna chu – “Mihing hi theitawp bang a hi em? ti ahia a dawnhuna chu – Thagau mangthaite pui ah mithiangthote siampitin a, Lalpa chawihawi (Lopina piak) chu a hi” atîu a hi.

Pathian chawihawi hin a lopina i taklat ahia, Pathian hi a thilhitheidante hi a thilsiam a pat in i mu, a khutsuak thupi tak Aksite, Sawlte (Planet), Khawvel leh a sung a te hin nisin a lopina a sulang zing uh a hi. Zia lopina hi, chawihawina, zana piak chibai bukna hin a sulang a hi.

“Lalpa Pathian Bangkim hithei, Um tasa leh um laitak leh hung um ding chu, A

thiangtho hi, a thiangtho hi, a thiangtho hi atîu a. Thilhing palite chun Lalchutpha ah kichu chu a chawihawi un, jana a piau a hi. (Thupuan 4:8-9)

I Bible in ei kawkmû gual in i hi zosia chu Pathian lopina ding ti a hia, Paul hinkhua le a tuppipen chu a hi. Paul hinkhua a hin Pathian lopina, chawihawina kilat dan neukhat holim hitîu.

1. I Ginnau (Php. 2:9-11) :

Jesu hi Lalpa leh hukdampa ding a i puanlat, i pawm a hi, Pathian i chawihawi in i su lopi a hi. Luka chun migilo pakhat lungheina'n van ah mite a kipak ui ti imu (Luka 15:7). Mi pakhat a pianthak hin van dâk a sâi ging a, van mipite a kipak uh a hi. Jesu Khrista Kraws ah thi thokit kha Pathianin sangtak in a chawisanga, min zosia chung in min chungnung pen chu a pia ta a hi. Tichun Jesu min ah mi zosia a khupdin ua, Vanchung leichung leh lei nuai ah thil um zosia leh Lei zosia'n Pa Pathian lopina dingin Jesu Krista chu Lalpa ahi ti a puanna dingun. I gitlona'û thupha i chawihawi hin Pathian ngaidamna i changta, i gitlo tawpna chu Kraws ahia Pathian lopina ahita a hi. Mi gilo in Pathian jangaina dawng ah ginna Lalpa Jesu a pawm hin Pathian a chawihawi ta a hi. (Hebraite 11:6).

2. I taksau : Migilo in a sual

sim a Pathian jangaina zala Pathian hukdamna chang ah Pathian cha ahinung ah a hi ding thupipen chu Paul in Rom mite kianga a thucha hi a hi "Chutichun suapite, Pathian jangaina ziakin, kithoina hing leh thiangtho leh Pathian pawmtâk dingin la taksau chu kilân dingin ka don la hiu, zia chu thagau lam ah la biakna dan ding him uh ahi ngal a" (Romte 12:1).

I taksau hi Pathian thilthawn piak (gift) Lalpa a pat i dawn a hia. I pianthak hun a hin i thagau chu Lalpa tawh kizawp ahitai. Zia i lei taksau hin Pathian bang zia ah i chawihawi ding ahem iti chun, Bible chun "La taksau chu la sungua um, Pathian kiang ah kipat la mu'û Thagau Thiangtho chenna In ahi ti leh nangmau â la hita puau hi ti helo la hiu em? Man piak ah chawksa la hitau hi, ziaziakchun, la taksau ah

HINNA VÂK

chun Pathian chawihawi tau in” (1 Ko. 6:19-20), Nisin hinkhua i nek leh dawn, sil leh chen, i tawidan zosia ah Pathian chawihawina ding chu i taksau kilân hi a hi. Ziakiachun i Lalpa Jesu’n le ‘La vâk uh chu mite mit mu in vâk ta hen” ati a hi (Mat. 5:16). Paul in a gengual in “Thilpha hi ding ah Khrista Jesu ah chun siam ah um in, Ama khutsuak ihi ngal un, zia thilpha hi chu i khawsak dan ding ua Pathian in a la siam khawlsa a hi. Unaute haw i thilchin kilawmlo tak tak haw hin Pathian a chawihawilo ding ahi chun Lalpa min ah sual sim ngal ding a hi.

3. Pathian chawihawina hinkhua : “Chutichun, suapite, Pathian jangaina ziakin, kithawina hing leh thiangtho leh Pathian pomtâk dingin la taksau chu kilân dingin ka don la hui, zia chu thagau lam ah la biakna dan ding him uh ahi ngal a. (Romte 12:1)

Pathian jangaina ziakin i sualte ngaidam a hia, Pathian cha daw i umtak ihi tau ah. I hinkhuau ah i taksau ngei ua Pathian i chawihawi hi, thagau lam ah gingtute i pitinnau suklatna chu a hi. Bible in a gengual a kilânte chu, a kipiaknau Pathian in a pawm a, i thagau uh Pathian thu kizilsak zala, i taksau ah Khrista melhawina kilatna a hi.

Thagau thiangtho ah dim hinkhua, tuihinglui hung luangdaw k chu a hi. Zia gual hinkhua (halthakna) hi eimau in um leh vang midangte kiang ah chanchinpha hi tângkopi le ngai puan ah, a zawt in ei hun zuan mai ding a hi.

India gam ah kawlte laka Hindute mi ngaisan pen la phuakthiam – India Lapi “Jana Gana” (National Anthem) phuaktu Rabindranath Tagore khan hitihin ati ahi, “Aw nang uh Khristiante hin hinna thuguk, limna thuguk nei la

kitiua, Limnathuchula kawil ngei uh hi in a kilang ngal a, zia la limnau (kipaknau) hi a tak tak in la hinnau in latsak thiam leu chun aw, nasa taka kikopi ngai puan a, vachate an piakna mun (Feeding place) gamlak ah vachate hi saggam leh kawlgam (India) ah An a pe sekua, a dawikhawp tak ua a nek dinguh An a kawipiak sek ua, kuaman a that ngai puau hi. Vachate zing leh zan in ko ngailo in zia tak mun chu a zawt gual mai un, India mite'n le hukdamna chu hun zuan mai ding ahiu. I nisin hinkhuau hin midang in Jesu muthei leu dawi a um mama hi.

4. Kidona : I gamsung ngei inle tulai ahin kidona phual a um ihu a. I lungthimteu le kidona thu in mun a nei ma ma hi. Zia gual ahin i Khristian hinkhua hiatmil keilo ding chu kidona hinkhua hi mang zing ihu a hi. Sual leh a pha kidona. Mithiamte chun i lunggil hi

kidona phual ahi atiu a hi. A dik ma ma ziang hi.

I kidopi teu chu taksa leh thisan ahi pua, lalnate, thuneinate leh zia khawvel thim chung ah vaihawmte tawh van mun ah thagau gilote tawh kibuan i hizaw ngal ua (Eph. 6:12)

I kidopite hi taksa mutheilo thagau lam thil ngen, mihing hatna do theilo ngen ahiu a hi. Paul in a gengual in, "Ei uh kigalvannate chu taksa thil ahi pua'n, kulpi dettak phiatna dinga Pathian thilhitheina chu a hi.

Lungthim ah ngaitua kawm ah mi nialna leh Pathian dona ah kigêl thilsâng takte chu suchim in Khristian thu ka nunsak sek hi (2 Korinth 10:4-5)

Satan chun pilgukkel tak leh pilvang tak in i lungthim ua hin panmun a khaw ah zia chu a kulpi det chu a hi, lungthim ah ki ngaisan guk nate,

HINNA VÂK

suangtuana sang tak tak, Pathian dawidan kalte chu Setan kulpi ahia. Ahin gingtu ki galvanna chu zia kulpi phiatna ding a Pathian thilhitheina chu a hi. I galvan thupi pen chu Pathian thu ahia, zia chu Pathian thilhitheina a hi. Pathian thu chu Joshua gual in a sun a zan in ngaitua leu hin i kidona mun in zotu hi zing ding ihui. I Lalpa Jesu'n le Pathian thu in kidona a zo a hi. Khrista zal a chu

ei haw hi galzote sang ah chungnung zaw ihui (Romte 8:31-39 ngun takin zil in).

Khristian galdona man um chu haksatna beidawna thuak ngal ding a hi. Peter in a gen gual in, "Khristian ahi ziak in thuak taleh zakcha kihen, zia min ziak a chun Pathian chawihawi hen.

Lalpa'n sim zosia a dingin malzawl ta hen.

- *La hinkhua'n Pathian leh Haksatna hi khawi zawk la ngai pawimaw zaw em? La ngai pawimaw zawk zawk chu la hinkhua ah thuneitu hi ding a hi. Haksatna sang in Pathian in thil a bawl thei zawi ti la hiatchian chun haksatna'n hun zo ngailo ding a hi.*
- *Pilna a sang po leh buaina a sang a ; Hiatna a sang po leh chapona a tam hi. Kingaitawmna nei hin vang Lemna a siam sek hi.*
- *I thu hiatte'u i pawm dan ua pat in i lungthim di a hiat thei hi. Zakda thei di i mu tam chun i lungthim put dan a dik zolo a hi kha thei hi. Lungthim hisello hi'n millo a ki hau sek a, Lungthim hisel nei i dawi chun i thil thil dan siamphat gua hitiu.*

~ *Anonymous*

“PANPITU NAI ZING LALPA” (Sam 46:1)

~ *Pi S. Melody*
RMHS

“Pathian chu i kisel nau leh i hat nau, lungkham lai ah panpi vak ziang naicha um a hi” Sam 46:1.

Lalpa chu lungkham lai ah panpi vak ziang nai cha um ahi tak tak hi ti ka hinkhua ah a tak ah ka mu dan hun sulang ing ka.

Kum 1997 unau kal buailai a khan ka pawsal chu COTRTS Vizag ah Bible zil in a kuan a, kei chu ka chaté’u tawh Lamka um ding leh DBC ah zilding in ka um ua, buaina hung khawk zel ziak in keima zilna lam sutzawp thei ahi ta pua, ka pawsal zilna mun ah Family ah um thei na di umlo ziak ah kizui theilo himaleh buaina ziak ah Inlua ah zilkhawm khawm thei ding leh Commonmess join thei ding ah phalpiak ka hung hi tau a, ka pawsal ala kuan zota chun a mun lam ah bangkim ala sukfel phat in ka chateu 3 (pathum) tawh ka hung kipan

dawk tau hi. Imphal ka hun zuan tau, Paite pau matlo ding ti ahi phawt a, Hmar pau kala thiam sa a hi zia kin a pawimaw na mun ah Hmar Pau mang in tuibuang tuam chu ka hun pêl thei tau. Imphal ka tung ua, ka chuannau Gari a pat kum in ka giakna diu Hotel lam zuan in Rickshaw in ka chiau a, Rickshaw apat ka kum phat un Basket pakhat sung ah COTR ah ei uh lam mi umte a ding leh kei uh a ding ka paisa zosiau ka kawinau chu Gari a pat ka kumthak nau ah nusia kha kahi lam uh kahun he dawk tau hi. Law (Pay) la kila theilo, a tam lam ahi thei

HINNA VÂK

tiang tiang hun hawl khawm unla hun puau in tia ka pawsal in a hung vaithak gual ah ka mu thei tiang ka hawl khawm ahia, da talua ah ti ngaina helo in Rickshaw ma chun kaki lekit a, kappum in Pathian kiang ah titakzet ah pauchap in mi lak a chun ka puakzak ta mai a, lunggim tak leh lunggil tak ah ka pauchapna chu Pathian in ei lawtin sak a, ka basket chu ka suathak na mun un bittak in ala um hi. Ka tunnau Hotel ah kua mi ka hui em ti hung entha lawi laka kipat buaina tuak lo in a zing in Dimapur ka tung ua, kuli te'n ka chuanna ding uh Train/Rail diklo ah ka van uh tawh a hung thak lut ua, ka buai kit mama ziang ta, ka chate le vangik pawzo nailo uh, ka train dik pen ua chun a tai daw ma deu in kaki thak lut thei ham ham uh a hi. Dîp dap a um man ten hi. Train Station pakhat ah chawmcha a kichawl sung in ka tui dawn ding uh ka va thâl kal in ka train uh ala kipan dawk man a, ka train chuan nau nunglam Daba kawtkhak nunglam in

kaki khailut man ham ham hi.

Dîp dap a um sek ngei, Vizag ka tung ua, ka pau in eila dawn ah, a nuam ta ngei mai, College kai a hung hun ta, ka chateu 2 chu college campus school in a kai ua, a neupen chu School kai theinailo ahi ziak in nau dawn ding Telegute (Ka inlua nateu nu)ka lau a, ka hung kaisan chiat u chu, ka nausen uh sun nitum ah hailo ah ala kap ahi dan ahun gen uh leh ka um thei kit tapua, lunggim a um mama kit hi. Pauchapna tamvei tak nei in Pathian buan in An te ngawl in Pathian kiang ah ka haksatna te'u tut in lunggil tak ah ka pauchap nung un nausen classroom ah pui ziang dingin Registrar pa kiangin ka va dawn a, kuaman ei kineppi hilo maleh phalna kamu thei hi.

Lungdawn lai ah panpitu nai zing Lalpa chung in ka kipak na lawm lawm e.

Zia a chung ah keima chanchinte ah lungdawnna

ka tuak lai ah Lalpa chu thûk tak ah/lunggil tak ah ka nai dante leh zia gual ah Ama ka nai ziak ah Aman le ei nai a, ka buai nate ei suk kian piak zel ahi dan ka mu chian mama hi. Unaute haw tuni'n buaina leh haksat na neilo kei ki um dingin ka gingcha puai, mihing ah khawsa i hi naklai ziak in Insung ah Mo leh tekpi kâl ah haksat nate, Pa leh cha kâl ah te, Nam leh Nam kâl ah te leh a dang dang ah haksatna chuam chuam nei ngei hitiu. Zia haksatna zosia suk venna ding a chun chunglam en ah, Pathian nai chu a pawimaw pen a hi. Midang dangte kiang ah i mawk gen gen phat leh zia thute chu chiasawn zel in ei ma kiang ngei a hung tun kit phat leh a haksat zaw diak i tuak sek uh a hi. Lal Jesu ngei inle a Pa sawlna gual ah lei chung mihiamte tandawk ding ah a hung thuak ding chu huphul ma ma in a Pauchap a, himaleh a nasep ding tatna na a sep zaw phat leh Pa changlam ah thamuang tak

ah a chut ding a thîl ziak in Kraws a chun a hung thuak a. Zia gual ma ah chun ei hawn le chunglam ah i kipakman di' u thîl zing pum ah i haksatna te' u tawh chunglam en zing ah Pathian nai dingin Hebrai ziaaktu'n a hun til kho hi.

Tuchung ah i Meitei gal ua meiteite zia gual ah lopi leh lau umte lak ah zia tiang ah i bitna teu hile i lungdawn lai ua Lalpa lam nga ah i pauchap nau nasatakte ziak a hi i tilo thei puau. Thudik a i pan nak chun Pathian in panpitu di a hun sawl zel mai a, zuau tincheng ah a hung heknateu ah le thudik a hung kilang to to ta mai a, amau sung ah buainate sangto zel in amau leh amau le aki nawk tua tua ta mai ui. Ziaziakchun alim lai ah Pathian nai ah i taikhawm lai gual hun teu hi thathamlo in chunglam thil hitheina ko zawm zel hitiu. A gam leh a felna i hawl masak nak chun Ama'n i pawimaw teu a he nai.

“ZIKLO DÂN”

~ Rev K. Lala
Lamka Kochuam

Tuchung a ithupi ding uhi Ziklo Dân ti a hi. Mizoram Presbyterian Kochuam Ziklo Dân Bu akipat lâk khawm ahi.

I. Constitutional Khâwmpi chungchang : Constitutional Khâwmpi in a huap chu PCI General Assembly, Synod Khâwmpi. Presbytery Khâwmpi leh Pastor Bial Khâwmpi te a hi.

1. Moderator/Chairman a um lemchanlo ah athasang dingin, Moderator/Chairman pawtdawk naipen in Khâwmpi pui huai in ah. Zia chule a umlo kit ahi chun, pawtdawkte lak ah a nai lam deu pen in a pui huai sek hi. Pawtdawkte lemchang a umlo u chun, Elect in a pui huai mai sek hi.

2. Khâwmpi chu Ex-Moderator/Ex-Chairman te'n a puihuai u chun Valedictory Sermon le a gen ngâl sek ui.

3. Elect in Khâwmpi a pui

ahi chun Valedictory agen alemlo ziak in Pathian ni zân Sermon pa-ngâi gending in Nomination Committee in aguat te'n thu cha a gen mai sek ui (Thil um zen zen lo chu a hi).

4. Pastor Bial Khâwmpi hi Constitutional Khâwmpi ahi ziak in, Bialtu Pastor in apui huai ngeiding a hi. Pastor panglo in Khâwmpi matlo ding a hi. Bialtu Pastor alemlo chun Officer's Meeting in ahem, Senior Executive Secretary in ahem Pastor thasâng ding in Minister lemchang a guat maisek hi.

5. Synod, Presbytery leh Bial Khâwmpi ah Pathianni nitâklam mual Kikhawp neisek ahin, Moderator/Chairman in mual Khâwmpi

chu a kaihuai sek hi.

6. Moderator, Elect leh Chairman Elect taphawt in Khâwmpi Vaihawm masang Nomination Committee ah apang sek ui.

7. General Assembly, Synod leh Presbytery ah Moderator in gown (Moderator in a silsek puanâk chual vawm) a aksek ui.

8. Modertor pawtdawk ding leh Chairman pawtdawk dingte'n Moderator/ Chairman thak kiang ah akhut sân (charge piak daw) lai in, palaite'n dingin aki hiatpi sek hi.

9. Moderator/Chairman hilai leh Secretary te'n Vaihawmna Minute Bu ah min azik (sign) lai in palaite'n dingin aki hiatpi sek hi.

10. Khâwmpi ah Agenda neitu/thelut tute'n a thu hilchianna a gen masa phawt ah, zia zawphat leh palaite'n genkhawm ahi pan sek hi.

11. Agenda gending phât leh Moderator/Chairman in Secretary bawlding umlo khawp ah kawiding a

hipuai. Agenda tâklang ding leh hilchian ngai a um leh hilchian ding in Secretary ko in tin, zia zawphat chuleh Moderator/Chairman chun Agenda thelut tute ko mai in ah.

12. Agenda Genchian Dân: Thu thelut genchian na lam ah phatchuam ngai tâk luat ziak in palaite'n eipawmpi ngei ding in ka hun chial ui, a kiti ngai puai. "Ka thu hun thelut uhi Kochuam a ding ah thilpha hiding ah hiat ahi ziak in, ka hun thelut uh a hi." ti mai ahuntawk hi.

13. Vote Lâk Dân: Rawtna pathum a um in, zathuaptu umchiat ma leh vote lâk ziang lophawt apha zawi. Rawtna pani ah siamphawt zaw nung ah vote lâk sek ding a hi. Vaihawmtu kimkhat sang ah tamzâw dawina ngei ua thupukna siampi ding a hi. Hun tamtak ah rawtna nunung zaw ah thupukna siam a um kha sek hi.

14. Vote Kibang: Vote ahung kibang chet thei a, Chairman in ruling anei ding ahi. Casting vote ahi le chu a lempuai.

HINNA VÂK

Khâwmpi a chun Moderator/ Chairman in vote anei ngai puai. Chun Chairman in ruling anei ding dân ale, chiadân akinei hi. Chiadân pa-ngâi then danglam thu ah rawtna hunglut a hi chun, vote hung akibat le chiadân pa-ngâi ah chiading in thupukna siam hi aki bawlsek dân a hi.

15. Vaihawm Khâwmpi na ah hun pat ma'n La aki sa ngaipuai. Sun chawl lutkitna ale Moderator/Chairman la tel aneilo chun La sak tei tei a kul puai.

16. Minute Zikdân: Vaihawm Patna ah ti lo ngâl, mun dang ah Khâwmpi Moderator/ Chairman te a min uh vel ziklo a khawkpuai. A ziak chu Khâwmpi kaihuai ngei ding ah Moderator/Chairman te chu ngaisa ahi ziak in, "Moderator/Chairman Rev. XYZ in agenda hilchian ding in ako ah" a kiti ngaipua, "Moderator/Chairman in agenda hilchian ding in ako ah" timai zawk hi a phai.

Moderator/Chairman a umlo ua chun, a mun luatu te taklat a phai. Etsakna'n

"Moderator/Chairman a damlo ziak in Ex-Moderator/ Ex-Chairman Rev.XYZ in Khâwmpi Vaihawmna eipui huai ah" kitisek a hi.

Chun, Minute zik hi i Kochuam a chun "ti a hi" ti lo in, "ka tiu hi" ti in a kizik zaw sek hi.

17. Min zik (Sign) Dân: Min zik dân hi, changlam ah Moderator/Chairman, veilam ah Secretary te min zik ding a hi. Min hi bracket sung ah CAPITAL letter ah aki zik sek ah, zia chung achun sign ki bawl sek ahi. Min signature ah Rev/Upa ti khel sign khawmlo ding a hi.

II. Vaihawmna leh Committee kaihuai chungchang :

1. Pastor chu a umna Kochuam ah Committee Chairman ahizel sek hi. Official ah Kochuam lekha thawt dawna a le Chairman min ah Bialtu Pastor min kizik zelsek ahi (letter head a le). A umlo kal ah Chairman na lading in Vice Chairman kiguatsek a hi.

2. Tualsung Committee:

Kochuam tin ah tha-thak Committee khatvei bek Official Committee nei ngei sek a hi.

3. Upa Bial: Kochuam tin ah Kochuam inkuan bangzat ahem Upa te'n etkawl bik nei in, Upa bial siam in, Upa te'n a bial bik ua mawpua in, siatni phatni leh Kochuam kisimna leh thildang dang ah a bial sung a hiatchian ten ding ah ngai a hi.

4. I Kochuam vaihawm nau hi atam lam dawidân ah kichia a hia, himaleh i Kochuam Dân tawh kitauklo (Dân kal) ahi chun atamlam dawidân ah chia khel ding ahi diak puai. Kochuam Dân leh Kikaihuaina a lal pen sek hi.

5. Thu haksadeu ngaitua hun ah lung gual tawklona a umthei ah, lunggual tuakna ahilo chun Thupukna siam mai lovin, hun lemchang dang ah ngaitua dingin kawi ahi sek hi.

6. Thasin Committee hun bik nei maleu hinle, akâl lak ah Committee chutkhawm a pawimaw chang a umsek hi. Zia gual hun achun Chairman

leh Secretary kihetuak in Committee ko ahi sek hi. Bang Committee hiziang taleh memberte'n ngaidân a gen suak chiat sek apha. I gensuak lo chun kitheu thâkna ngai abailam a, kilung guallona a tun thei hi.

7. Thil khenkhat Committee ngaitua ngaite, banghem ziak ah phone mangcha ah pawlam ah thu sukpuak ziang maisek hi a phapuai. Committee chutkhawm a ngaitua chu him pen a hi.

8. Kochuam Committee ah member tamzaw dawidân ah thupukna siam ahisek lai in, thupukna khenkhat dawitu tamzaw le a umdiaklo chang a um sek ah, zia chu vote lak khel lova thupukna siam apha pen sek hi.

9. Pawimaw bik, alo theilo nalaitak umthak ahilo chun, Committee ngaituasa leh thupuksa gual a chiapi hamham ding a hi. Thupuksa sut maimai leh vaihawmsa suk danglam mun ahi chun Kochuam a zâ umlo sak thei hi.

HINNA VÂK

10. Kochuam Committee peng chuam chuam ah Committee pawlam mi apan khakna a um chun, zia gual hun ah Kochuam Committee memberte kinial ahem ngaidân kikawkal tak neilo apha pen a, a thei chan ah kinial pumpel sek a hi.

III. Pathian Biak Kikhawp chungchang :

1. Kikhawp puitu Chairman chu za um tak in a kichei sek a, coat leh necktie tawh aki thuam ham ham sek in, zia hin Kikhawpna a za um sak sek hi.

2. Chairman in thugentu huntawp tiang piak hi kibawl ngai talo a hi. Pastor/Minister te tilo chu.

3. Kochuam Committee member te bep hi Pathianni zân thugentu ding in Kochuam lian ah a tangpi in amang ua, a phapen vang het ahaksai. Kochuam dinmun zil ah chiapi maisek a hi.

4. Kikhawpna Chanvo Neitute: Thugentu, pantu leh thupi hawngtu te'n

Kochuam hotute hiatpina leh lemtina lo chun mani chanvo midang piaksawn ziang hi kibawl ngailo a hi. Mani hun chawpchil tak ah mat theilo thut nading a um chun, Chairman/Secretary kindeu in a hiatsak ding a hi. Chairman in pha ati dân ah chiapi mai di a hi.

5. BiakIn ah thupuan dingte chu Secretary kiang ah piak khawm ah ama'n a puan hi a phapen a, michuam chuam in thu apuan hi hun sawtna a hin. Kikhawpna aza um lo sak bep hi.

6. Kochuam Kikhawpna hun mangding dang Lapawl, solo, report leh adang dang a um chun Chairman lemsak pina ah bawlsek a hi.

7. Kikhawpna puitu dinmun hi apawimaw mama ah, thugentu thugen genchian/genlem kul a um chun chairman in agen chian ngâl maisek hi. Kochuam Thugin kal thu a um khak chun Chairman in a genthian ngei ngei a phai.

8. Thunun hi uluk tak ah pauchap piakna tawh nei

zêl sek a hi. Haksatna leh lemchanlona hial um a hilo chun Dân hawkim Kikhawp, Nilai zân ah bawlsek a hi.

9. Dân sung ah laklut, pem dawnsawn leh pawldang apat hunglut te lawplut hun ahin a mau ahung Kikhawp ngeiding uh a hi. Damlona ziak leh khualzin ziak ah

kimlo te chu ngaithiam thei a hi. Zia hile Nilai zân Kikhawp ah kibawl sek a hi.

10. Kikhawp hun patnung achun ding a lasak khawm a hisek ah, zia zia a chun 'dingin sa hitiu' ti a ngaihua, lasak zaw a le 'chu hitiu' tikhel a kul puai.

LEKhabu KIHAWNG THAK

Lekhabu ziktu Chanchin Chawmkim



Rev. T. Zuanlal hi Rev. (L) Pautinlam leh Pi (L) Lamzating te chapa upa pen a hi. January 26, 1948 in Mualdak khua, Henglep Sub-Division in a piang hi. Lekha zilna lam aah B.A. (G.U.), B.R.E. (U.B.S., Yavatmal), M.A.R. (SAIACS, Bangalore) in a zo hi.

NEIG Mission (ECCI) muai ah Manipur Christian Organization/Evangelical Organization Church Kochiam pawlpi ah kum 35 sung Lalpa nasepna na pawimaw tak tak a la septe - Bookseller-Manager, Evangelist-at-large, Dinwiddie Bible College - Teacher/Lecturer (ECCI muai ah), chun pawl sung ma in, Departmental Secretary, Director, District Superintendent, Executive Secretary (kum 15 sung a sem bawh hi), Mizoram Presbyterian Church Synod muai in, Manipur Presbytery ah Presbytery Secretary na a la sem bawh hi, January 2009 in a penston ta a hi.

Inesung lam thu ah chun a inneipi Phakhuai d/a Pu (L) Liankhokam (Biang) tawh December 20, 1984 in Hill-town Biakin ah a la kikhutsui in, chawp pail leh chapa pakhat a nei u'i. Tuhin Gouchinkhup Veng, New Lamka ah a cheng u'i.

VAIPHEI KHRISTIAN CHANCHIN

VAIPHEI KHRISTIAN CHANCHIN

Leh

Manipur ah Chanchinpha Lut Dan

Rev. T. Zuanlal

Rev. T. Zuanlal
B.A., B.R.E., M.A.R.

Zia lekhabu hi Synod Office ah ₹ 300/- ah chawh thei zing a hi.

“TIZAT UM TAK LEH LAMDANG TAK AH SIAM” (Sam139:14)

~ Dr. Wandahilin Kharlukhi

Zia thutawn “Tizat um tak leh lamdang tak ah siam ah um ka hi” ti hi Sam 139 na ahin a kimu, zia hi Bible ah Sam lâ langsâl pente lak ah khat a hi. Zia mihing hîna lamdang tak hin, tizat um leh maksak um khawp lunggêl a suakdaw sak a, mihing hîna lamdang dân hi mihing ngaituana’n a bat phâklo a hi dân Sam zîktu’n hin a genna a hi.

Mun khenkhat a chun, “tizat um” ti thumal hi kichâtna leh zâumna latsak thei khawp ah lau-umna genna ah mat a hi. “Lamdang tak ah siam” ti thumal hin phatak ah kenchuam, têldawk leh dawichuam na a kaw k hi. Chawmcha genchian di hitalehin, ‘tizat um’ ti hin sakei lau ah lau lampang hilo in, ngaisâna, kichâtna leh zâna lam a kaw k hi. Thil siamtu Pathian in mihing taksa bâk chuamchuam te a siam dân hi phatak ah ngaitua det det te chun, tizat um sa ngêi ding a hi’u. Chun, ‘lamdang tak ah siam’ ti hin thilsiam dangte sang ah chuamna lam a kaw k hi. Mihing mêlput ki lemkuat dân, pian dân apat khawsak

dân tiang in, thil dang sâng in mihingte hi dawichuam i hui tîna a hi. Zia thil lopi tak hi thil tungthut (accident) a hi pua, phatak ah guatlawk a hi zawi. Mihing taksa leh lungthim kizawpmat dân hi phatak ah i sui chun, Pathian thil hîtheina lopi leh mak dân hiatdaw thei a hia; Ama chu chawihawina, zâna leh lopina piaklo theilo a hi. Pathian lopi dân gêldaw theina lungthim i nei zia k ua hin, Pathian chungin i kipâk ua, i chawihawi ua, i zâ uh a hi; zia hi thilsiam dang tawh i kibatlonu’u le a hi.

‘Tizat umtak leh lamdang tak ah siam ka hi’ ti hin Sam zîktu’n, Pathian in mihing a siam dân hi lopi leh mak a sak khêllam in, Siamtu Pathian lungthim

leh mihing hîna thugûk suidaw thei a hi. Pathian mihing ki siam dan lamdang tak leh a lemguat lopi dan hi Genesis Bu ah pat in muthei ahi bawk a, zia apat hin Pathian lunggêl mak dan ei hetdaw sak thei hi. Genesis 1: 26 a & 27 na ahin Pathian thu puandaw zia gual hin a kimû'i;

‘I kibatpiu eimau gual mêlpu’n mihing siam hitiu... Tichun Pathian in Ama mêl tawh kipua in, mihing a siam ta’i”

Achung ah ki tâklang Bible châng ah ‘Pathian mêlpû’ ti thumal hi thu pawimaw leh a châbi a hi. Zia thumal hi Sam zîktu’n ‘tizat um leh lamdang tak ah siam ka hi’ ati hi tawh bailam tak ah mêkmat thei a hi. Ziaziakchun, Sam zîktu hi ‘tizat um leh lamdang tak ah siam’ mai bep hilo in ‘Pathian mêlpû ah tizat um leh lamdang tak ah siam ala hi. Zia ginna hi Sam zîktu chung ah a dik gual tho in, khawvel ah mi zosia chung in le a dik a hi. ‘Tizat um leh lamdang tak ah siam’ ti thumal ah ‘Pathian mêlpû’ ti ki bêlap hi mihingte â ding ah thil pawimaw leh tîlkhotu

pha pen a hi. Mihing khat ah hung piang chu Pathian mêlpû ah, numei ahiloleh pawsal ah siam tîna a hi. I lêng ua Pathian mêlpû ah tizat um leh lamdang tak ah siam chiat i hiu; aziak chu, vîn Pathian lim eimau ah a bek chiat a hi. Thilsiam dang zosia sâng ah i danglam zawk na’u chu Pathian mêlpû ah siam i hina’u hi a hi.

‘Pathian mêlpû’ ti thu hi numeite â ding in a pawimaw diak hi tî thei a hi. Numei hi le thil tungthut (accidental) ziak ah siam i hi puau a, umzia nei tak leh guatlawkna um ah siam i hiu. Ziaziakchun, Pathian guatlawkna dungzui in numei hi pawsal sâng in a pawimawlo diak puau a, pawsal tawh kibang tho ah, lamdang ah siam a hi tho u’i. Pawsal thuneina khawvel a hin, ‘Pathian mêlpû’ ti hin numei hîna a chawisân mai hilo in, pawsal leh numei kikhendanna khawvel ahin i kinepna nâk uh a hi. Pathian mêlpû ah siam i hîna’u hi ki hechian leh pawmdet bep hilo in, i hinnau ah i latsak ua, Pathian i chawihawi ding uh a hi.

HINNA VÂK

Kochuam chiadân leh kivâipuak dân siamtu leh bulpatna ding chu 'Pathian mêlpû' ah lamdang tak ah siam i hîнау hi a hia; zia hi thilsiam dangte lak ah ei chawisâng tu a hi. Kochuam in zia hi i pawmdet ahi chun, kochuam sung ah numei leh pawsal kikhenchuamna ahiloleh numeite kawi niam chuamna hi a umlo ding a hi. Pawsalte bep hi Pathian mêlpû ah siam a hilo zia un, Pathian nasepna ate, Insung leh kochuam ate hin, ki zâtuaana, ki pawmtuana, ki ngainiamna leh ki hepituana (pawsal te'n le, numei te'nle) nei ding ah panlâk chiat a pawimaw hi. Zia chu a hi zing lai in, Kochuam, Insung leh khawtâng ah pawsal sep di chî leh numei sep di chî um sek maleh, a pawimaw chiat a hiu.

A tawpna ding in, numei leh pawsal hi lamdang tak ah Pathian mêlpû siam i hiu ti hi a kichian a. Pathian in numei leh pawsal hi mihing bukim in, A mêlpûtu hîнау ei pe gêl gêl a hi. Kochuam leh thil chuam chuam ah, numei-pawsal ah ki khenchuamna leh kidâidanna te hin, Pathian

ei lemkuat dan a sudanglam sek a hi. Mi zosia'n ki thugual tak ah "Numei leh pawsal hi Pathian mêlpû- tizat um leh lamdang tak ah siam i hiu" ti i pawm uh a pawimaw hi. Zia pawmna pat chun, i mihing chanpite phatchuamna ding ah mawpuakna lianzaw la thei ding in ei tawsawt a, zia chu Pathian mite hîнау pawimaw tak le a hi. Taksa thil inle numei dinmun pawimawna hethiam nam ta phawt a khangto bîk uh a hi. "Zia tak a chun Juda mi a um ta pua'n, Grik mi le a um ta puai; zia chun suak a um ta pua'n, suaklo le a um ta puai; chuleh, pawsal leh numei le a um ta puai. Khrista Jesu a chun la lêng un pumkhat la hi ngâl un"(Galatia 3:28). Pathian mêlpû ah siam- numei leh pawsal te'n, sep didawl i kihêt ua, i mawpuakna chiat uh i ki zâ bawl ua, ki dâidanna leh ki kawiniam chuamna umlo a, kochuam Insung leh khawtâng in pan la chiat leu hin, i nam uh khang hât zaw sêm ding a hi. Tizat um leh lamdang tak ah pathian mêlpû te hin, ei siamtu Pathian chawihawi zing hitiu.



Sunna

UPA S.L. SAWITINKAM VAIPHEI

(11th October, 1965 - 4th May, 2023)



Amahi Pu. S.L. Lalminlian leh Pi Kimtinniang chate 7 (sagi) lak ah alianpen a hi. Phaipi Presbytery huapsung, B. Phainuam bial ah Nongpokphaizang kochuam ah alapiang in Pastor Sawikhawthang khut in Baptisma a lachang hi. 1993 kum in Nu. Khawlhawiniang tawh ala kicheng un chapa 2 (pani) leh chanu 2 (pani) anei un achanu lianpen Niangkhawnei (Nenei) Dan Thiang tho ah pawsal a nei sak hi. Achate'u min 1. Niangkhawnei (Nenei) 2. Lianlawpao 3. Thiamthianhawi 4. Nengkhawlung amausia hi a hiu.

Kum 2007 Tuithaphai Presbytery kikhawmpi 60 veina Upa hina ordination Rev. Vanmawia khutin ala changhi.

Famta Upa S.L. Sawitinkam Vaiphei hi khawtâng, kochuam leh Bialsung a ding ah mi kipezotak a hi. Mi hepi thiam tak a lian a neu tawh kivawp jiang thei leh mi pawl nuam tak a hi. Insung maicham ngaina mi le a hi. Kâlkhat sung ah a bîk in ningani (Thursday) nitaklam cheng leh aji tawh anak sike'u kawi in An ngawlin maicham a siam sek ui. Zia a neksik te'u anchang chu khawl in tamdeu ahiphat leh meithai chagate panpina'n a mang sek uh a hi. Hun hungchia jel in date 03/05/2023 ni'n Manipur gamsung buaina a hung tungta, zia nitak ahin mun khenkhat buai maleh khawsung ah Biak In kikhawpna aumthei nalai ah, Nilai zan thupi latu in apanghi. Thupi alakna apat chun kochuamte

HINNA VÂK

kikhawpna ah umchan ding leh Dan-te phatak ah zuidi'n a chial ban in, ka thinung tiang inle hemil lo ah la zui zing ding uh ahi ti'n dutui tak in hun a mang hi. A zing date 04/05/2023 hungtungin, gamsung te bawina hung khawk deu deu in ama leh a chapa neupen it umtak tangval melpha S.L. Nengkhawlun Vaiphei chun Meitei migilote khut in eimualliam san un, nat leh sat lungzinna umlo na gam eila zawtsan tau hi! Kumtuang gam eila zawtsan ni hi Anngawl ah a nek sikte'u a kawi ni'ule a hi.

Kochuam leh khawtâng a ding ah a pan laknate:

1. Kochuam Chairman a hijing lai in ei beisan a hi.
2. Bial Chairman inle ala pangta a hi.
3. Bial Treasurer inle ala pang ah.
4. Ziaban achun Phaipi Presbytery Standing Committee, Nomination Committee-te ah tawmngai tak ah ala pangsek mi a hi.
5. Chuleh amahi ahungtungdi Tangphai Provisional Synod kikhawmpi palai ding inle guat a hi.

A thagau Pathian kiang in chawldam henla, a nutsia a sungkuan te leh a lawi a pai zosia thamuamna chang taken.

*Report petu
Upa Khailian
Phainuam Kochuam*

November 2023

UPA GENTINTHANG
(1946 - 21th September, 2023)



Upa Gentinthang hi (L) Lulkam leh (L) Niangtin cha a hi. Unau Pawsal 8 leh Numei pani laka pawsal neupen a hi. 1946 kum in Chongkhawzo khawpêl Haipitang in a piang hi. Ama hi aneu apat mi hisel, chungjang leh thahat tak a hi. Pianken lungthim pilna le Pathian in a pia'i.

1965 kum in Manipur Rifle in alut a chawmkhat zaw in Imphal apat Assam Regiment in alut theng a, Boxing sports lam in a kipia, command tiang a tung hi.

1969 August ni 13 in Chongkhawzo ah a chenkawm piu (L)Pu Thongjang len Pi Veikim te cha upa pen Nu Ngaklhing tawh aki cheng ua, (L)Rev.Siaktinkhai khut a Baptisma chang in, pindan in aki khutsui ui. 1971 kum a Pakistan Gal kap in a pang a, Dec.3,1971 in Pianthakna kichian tak a nei hi . Gal kichai zaw in inlam ah suti hung pawt chu civil hinkhua a mang den tai.

Chapa 4 leh chanu 3 anei ua, a chapa te'u 3 Army pension in, a neupen pan a sem nalai hi. A chanu te'u 2 in pawsal kitup tak tak nei in , a neupen nu'n Guwahati ah Nurse a sem hi. Tu pawsal leh Numei 16 amu man ah, minsak 7 anei hi.

THAGAU LAM KIMAT DAN

Chongkhawzo ah a chen sungin Kochuam committee in term bangzat ahem apang hi. I gam ua Halthakna leh Gamthim veina (mission awakening) vanglai 1974-1980 laivel khan gamthim

HINNA VÂK

veina leh thagau lam limna nasatak in ala chang hi. Ama phâktawk ah lo giakna haw nasan inle Labu, Bible pua'n a lawi ngaite Upa Lunpau, Upa Tongkhawzuan lawi tawh ala kithua ui. Sum leh pai hawlina lemchang zaw ngaitua na'n Chiangpi lam ah kipem pheii in Chiangpi Bazar ah Kochuam phudawk pawl in Chairman in bang chan hem ala pan sak ui.

1997-1998 Sunga Lamka lam buai ziaak ah khua haw haltum ahi phat in Shillong ah achate kianga akhawsak lai in Assam leh Arunachal mission field ah ava zinin Arunachal gamsunga school masapen Mirem School mun di mi huan vat thianna leh School sakna ah pang in *"kum tamtak masang ah gamthim ala kivei a, amau haw a dinga ki pauchap a, tu a mel uh kimu, kigiakchil ah amau haw chate hilna ding School sa ka hung pang thei chu kalung a dam mamai"* ala ti hial a hi. A gam mite khat dawisakna jal in Pasighat town ah transport bus compound in hotel abawl ua, buai kiven chan a um ah mani In leh lo chiat zawt di ti kona a um phat in Manipur in a kile kit tai.

1999 Nunglam in Gangpimual in Inmun a chaw, gam buai zaw ah hung ki thak pat in Gangpimual EOC (P) ah Upa masapen dingin 2003 EOC GOLDEN JUBILEE Gouchinkhup Veng a mat hun ah khan Ordained a hi. Gangpimual kochuam in term 2 Chairman in apang ah, 2010 kum in S. Munnuam in a kichawn pheii hi. 2011 kum in S.Munnuam Kochuam in Upa dingin a têt kit ua ,2012 kum ah Mizoram Synod Manipur Area Presbytery pali(4) ah khen ahi kum khan Lamka South kikhawmpi masapen, Jubilee Kochuam, D. Phailian ah matnan S.Munnuam Kochuam Upa hi dingin puanlat thak a hi. S. Munnuam Kochuam committee a pan zing ban in, Synod sum Treasurer, kochuam sum Treasurer te'n ala pang hi. Mata Pastor Bial Standing Committee member inle ala pang hi. S.Munnuam Kochuam ah Vice Chairman leh KKP te representative ah apan lai tak ahi.

2021 kum in akilik na'n aluchang atat kha Imphal lam in etkol

November 2023

a hi. Hung phakit in 2023 July tha in Zunthum sang leh thisan tawm in ahung buai ah, District Hospital in etkol ahia, Hung phato zel dinga kinep ahi lai in Date 21-9-2023 ni zingkal lam 11:30 in Lalpa kiang in ei chawlsan tai.

A Bible chang dawi Philipi 4:1-6, Azi kaingin ka thiphatlle kala dawi lakkhawm no.58 na “Tuhin athak hepina gam hawi nuam” tile lakkhawm no. 98 na “ Damlai luipi dungle vai hi zui maleng” ti tegel hi la hung sak ua lahung lam diu ahi ati gual in a bawl a hi.

VUINA PROGRAMME

Inmun in bialtu Pastor Rev.Thianganlim in hun amang ah, Rev. T. Zuanlal in malzawlina’n atha dawk hi. Biak In in Lamka South Moderator Upa Ginkhawlian, in puitu hina leh thugenna amang ah S.Munnuam Kochuam Secretary Upa Lamtinlun in chanchin genna nei in, S. Munnuam KKP te’n lapawl **“Pialgal chawlina phatak”** ti kha asau ah Bial Chairman Upa Thanglunlal in malzawlina’n hun a khak a, thanmual in Pro pastor C. Kailianson in hun amang ah, insung mi leh ngainatu tamtak tawh vuiliam ahitai.

*Report petu
Upa L Sanga
Secretary
S. Munnuam Pastor Bial*